

Imeruersaatit immiaaqqallu puui pillugit Namminersorlutik Oqartussat nalunaarutaat

Avatangiisit innarlitsaaliorneqarnissaanik Inatsisartut inatsisaanni nr. 9-mi, 22. november 2011-meersumi § 10, imm. 1, nr. 11, 12 aamma 20, § 35, imm. 3 aamma § 66, imm. 3 naapertorlugit uku aalajangersarneqarput:

Atuuffissaa

§ 1. Nalunaarummut ilaangillat:

- 1) Poortuutit 4,9 literimik imaqqortussusillit imaluunniit 0.125 literi ataallugu imaqarsinnaasut.
- 2) Immiaaqqanut maqitsivik.
- 3) Dunkit.
- 4) Viinninut imigassanullu poorineqartartut, taakkununga viinnit puaasartuliortut ilanngullugit.
- 5) Poortuutissat immummit tunisassianit imaqartut.

Imm. 2. Nalunaarummut ilaangillat poortuutit imeruersaatinik imaqartut angalanermi akileraarutitaqanngitsunik Kalaallit Nunaannut nassarlugit eqqunneqarsinnaasut.

Nassuiaatit

§ 2. Nalunaarummi matumani uku imatut paasineqassapput:

- 1) Poortuutit utertittakkat: Qillertuusat aamma puiaasat, igalaaminermik, aluminiumik, plastikkimik imaluunniit sisammik sanaajusut, immiaaqqanik, imeruersaatit kulsyritallit, imeruersaatit kulsyritaqanngitsut, paarnanit naatitanillu saftiliat aamma saftiliassaq kimittuumik akulik.
- 2) Immiaaqqat, suliarineqarnerminni immiassat, sungarnitsussat mamarsaataasinnaasullu imermut akulerullugit qappiortinneqarsimasut.
- 3) Imeruersaatit kulsyrimik akullit: Imeruersaatit imermi namminerisaminnik imaluunniit akuliunneqartumik kuldioxid-itallit, aammalu tungusunissaatinik mamarsaatinillu akuneqarsimasinnaasut, tassunga ilaallutik sodavandit, imeruersaatit eqeersaatitallit, ciderit aamma sodavandit imigassanik aalakoornartulinnik akullit.
- 4) Imeruersaatit kulsyretaqanngitsut: Imeruersaatit imerneqarnissaminnut piareeqqasut, kulsyritaqanngitsut, tassunga ilaallutik, imeq puilasumeersoq, imeq, imeruersaat tungusunnitsoq, tii nillertoq aamma kaffi nillertoq.
- 5) Poortuutininik utertitsisarneq: Poortuutininik utertitsisarneq, poortuutit atuisunit imarneqareernerminni tuniniaasumut, atortut atoqqitassanngorlugit utertinneqartarnerinik isumakkeerisussamut utertinneqarnissaannik qulakkeeriiffoq.
- 6) Poortuutininik aqutsisoq: Poortuutininik utertitsisarnerup ingerlanneqarneranut akisussaasuusoq.
- 7) Atueqqittarneq: Suleriaaseq, poortuutit ikinnerpaamik aalajangersimasumik amerlassusilikkanik atoqqinneqarnissaannik imaluunniit allatut atoqqinneqarnissaannik allanngortinneqarnerminnilu iluaqutaalernissaannik qulakkeerinissaq siunertaralugu ilusiligaasoq.

Poortuutininik utertitsisarnerit

§ 3. Poortuutit utertinneqartussat Kalaallit Nunaannut eqqunneqaqqusaanngillat imaluunniit tuniniaaqqusaanngillat, poortuutit utertitsisarnernut periusiusunut Naalakkersuisut akuerisimasaannut ilaareersimangippata. Naalakkersuisut poortuutit allat ingerlaavartumik utertitsisarnernut ilannguttarsinnaavaat.

Imm. 2. Pisiniarfiit poortuutininik tunisartut poortuutininik, imarneqareernerminni atuisunit utertinneqartuninik tigusinissamut, atoqqitassanngorlugillu utertitsinissamik qulakkeerinissamut

pisussaaffeqarput.

Imm. 3. Pisiniarfiit poortuutininik tunisisartut atuisut poortuutininik imaqaangitsunik utertitsineranni poortuutip akia utertitsinnerani akilissavaat.

Imm. 4. Sumiiffiit atuisunut sassaallertartut, taakkunungalu neriniartarfiit, akunnittarfiit sassaallertarfiillu ilanngullugit poortuutininik imaqaangitsunik poortuutininik aqutsisumut utertitsinissamut pisussaaffeqarput.

Imm. 5. Pilersuinermi ajornartorsiortoqarpat, ikittuinnarnilluunniit tunisaqartoqarpat imaluunniit pissutsinik immikkut ittunik allanik atuuttoqarpat Avatangiisinut suliasaqaarfimmu Naalakkersuisoq imm. 1-imi piumasaqaammik saneqqutsinissamut akuersisummik piumasaqaatitalimmik nalunaaruteqarsinnaavoq.

Nakkutilliineq

§ 4. Kommunalbestyrelsi nalunaarummi matumani maleruagassanik nakkutilliisussaatitaavoq.

Imm. 2. Kommunalbestyrelsi immiaaqqanik, imeruersaatinik kulsyrinik akulinnik, imaluunniit imeruersaatit allat, tuniniaanermi nalunaarummi matumani piumasaqaatit imaluunniit taanna naapertorlugu piumasaqaatit tamanna tunngavigalugu aalajangersarneqartut uniorlugit tuniniaasoqarpat, tassungalu ilanngullugu poortuutit poortuutininik utertitsisarnermut Naalakkersuisunit akuerisaanit ilaangitsut atorlugit tuniniaasoqarpat peqqussuteqarsinnaavoq inerteqquteqarsinnaallunilu.

Imm. 3. Aammattaaq nakkutilliinermut atuutsitsinermullu avatangiisit innarlitsaaliorneqarnissaanik inatsisartut inatsisaanni kapitali 12-imi maleruagassat atuutsinneqarput.

Pineqaatissiisarnermut aalajangersakkat

§ 5. § 3, imm. 1- 4-mik imaluunniit § 3, imm. 5 naapertorlugu immikkut ittumik akuersisummi piumasaqaatinik, kiisalu § 4, imm. 2 naapertorlugu peqqusummik inerteqqummilluunniit unioqqutitsisoqarnerani Kalaallit Nunaanni pinerluttulerinermut inatsimmi maleruagassat naapertorlugit pillaaammik akiliitsinikkut pineqaatissiisoqarsinnaavoq.

Imm. 2. Imm. 1 naapertorlugu suliat Kalaallit Nunaanni Eqqartuussivinnut siullertut suliaakkiissutigineqarsinnaapput.

Atuutsitsilernermet atorunnaarsitsinermullu aalajangersakkat

§ 6. Nalunaarut 1. januaari 2024 aallarnerfigalugu atuutilerpoq.

Imm. 2. Tamatuma pegatigisaanik immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaat nr. 16, 25. oktobari 2019-imeersoq atorunnaarsinneqarpoq.

§ 7. Immiaaqqat imeruersaatillu kulsyrinik akullit, utertitsisarnermut ilaasunik immeqqittakkanik puullit, nalunaarutip matuma atuutilinnginnerani akuerineqarsimasut akuersisummik nutarteriffigineqaqqinnissaminnut piumasaqaatitaqassanngillat.

Namminersorlutik Oqartussat, ulloq 28. september 2023

Kalistat Lund (atsior.)

Nunalerinermut, Imminut Pilersornermut, Nukissiutinut Avatangiisinullu Naalakkersuisoq

/ Natuk Lund Olsen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut